



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

51. Kalenderwoche – ab 20.Dezember 2009

Dor Weihnachdskarbfn - driddor Deel

Dann is uns dor Schwieschorsohn eingefalln. Dähr kann Diere dodmachn, sachd meine Gudste, der schdammd aus dor Landwirtschafd! Also, hammor dähn angerufn un dähr had ooch soford zugesachd. Er will am näschn Daach vorbeikomm.

Dass mir uns dann ahmds un frieh nisch duschn konndn, weil dor Karbfn in dor Wanne seine Greise gezochn had, is nisch so schlimm gewähsn. Mor is ja nisch so schlimm vordreggd, dass mor andauornd duschn muss. Es genieschd ooch ma, wemmor bloß de Zähne budzn dud. Un e bißl Wassor ins Gesischde. Abor ehm - dähr Karbfn had sich Schdigd fiehr Schdigd in unsre Härzn geschwomm. Meine Gudste had dähn dann ooch e baar Saladbläddschn ins Wassor geschmissn, damiddor nisch Hungor leidn muss.

Als wie dann dor Schwieschorsohn gekomm is, is mir reschlreschd ibl gewordn bei dähm Gedankn, was nu komm dun soll - Mordvorsuch Nummor zwee!

Dor Schwieschorsohn hadde unsorn Enkl, was dor Mischl is, midgebracht. Mischl is drei Jahre un e sähr neddes Gerlschn. Während dor Schwieschorsohn in dor Kische de Inschdrumende vorbereided had, sinn meine Gudste un isch gleich mid unsorn Mischl ins Bad gegang un ham ihm dähn Karbfn gezeischd. Mischl wollde wissen, wie dähr heeßn dud. Karbfn, had meine Gudste gesachd. Un mid Vorname? - wollde Mischl wissen. Da hab isch "Miroslaff" gesachd, weil isch an seine dscheschische Härgunfd denkn mussde. Un es had keene drei Minudn gedauord, da hadde unsor Mischl dähn Miroslaff ooch ins Härz geschlossn. Als wo dann dor Schwieschorsohn kam, um dähn Karbfn zu holn, da had dor Mischl gefrachd, was denn mid dähm Miroslaff bassiern soll. Da had

dor Schwieschorsohn erglärd, dass mir dähn Karbfn zu Weihnachdn essn wolln. Da had dor Misch
gesachd, dass mir dähn Miroslaff nisch essn kenn, weil - dähr dud ja lähm!

Un nu had ooch unsor Schwieschorsohn Närvn gezeischd. Dähm Misch sachn, dass dähr Karbfn
dodgemachd wern soll, eischendhändisch! - das haddor nisch ibors Härz gebrachd. Dähr is ehm
doch ooch bloß so e zivilisiertes Weischei wie isch un meine Gudste!

Mir hamm dann alle noch e bißl an dor Wanne geschdandn un hamm dähm Miroslaff zugeguggd.
Werglich e hibschor Kerl! Dann ham sisch dor Schwieschorsohn un dor Misch vorabschieded.
Dor Miroslaff is dageblehm. Abor irschendeenor muss dähm Karbfn dähn Garaus machen! Bloß
mir nisch, had meine Gudste fesdgeschdelld. Un wo se Reschd had, hadse Reschd.

Dann hadse ihre Freindin angerufn - un die hadde zufällisch keen Karbfn mähr abgekrischd im
Ladn un is gligglisch gewähsn, nu doch noch een zu krischn! Un mir warn dähn Miroslaff los!

E baar Daache nach Weihnachdn had dann meine Gudste nochma de Freindin angerufn, ob denne
dor Miroslaff geschmeggd hamm däde? Da had die gesachd, dass ihr Enkl zu Besuch gekomm is...
- drei Jahre ald! - ... un dähr hädde dähn Karbfn off Fridolin gedaufd! Un nu...

Ende

Eduard Sachsenmeyer